

Mál nr. 3

Knattspyrnudeild Knattspyrnufélagsins Fram, Reykjavík gegn Knattspyrnudeild Knattspyrnufélagsins Vals, Reykjavík

Kæra Fram

Knattspyrnudeild Fram vill leggja fram kæru vegna leiks Vals og Fram í Íslandsmóti 2. flokks karla þann 5. ágúst 1999 kl. 19:00. Lokatölur leiksins voru 1-1.

Eins og fram kemur á afriti af leikskýrslu lék Jóhannes Sigurðsson, leikmaður nr. 2, kennitala 140981-3579, umræddan leik. Jóhannes Sigurðsson átti hins vegar að taka út leikbann í leiknum vegna 4 áminninga samkvæmt úrskurði aganefndar KSÍ á fundi nefndarinnar 27. júlí 1999.

Knattspyrnudeild Fram byggir kæru sína á því að samkvæmt reglugerð KSÍ um knattspyrnumót, gr. 4.4.1., er kveðið á um að lið sem mætir ólöglega skipað til leiks og félag sem notar leikmann, þjálfara eða forystumann í leikbanni, telst hafa tapað leiknum með markatölunni 0-3, nema tap hafi verið stærra, þá skal sú markatala ráða.

Krafa knattspyrnudeildar Fram er sú að Fram verði dæmdur sigur í viðureign Vals og Fram í 2. flokki karla þar sem Valur mætti til leiks með ólöglega skipað lið.

Framlögð skjöl:

1. Kæru þessa.
2. Afrit leikskýrslu.
3. Úrskurður aganefndar.

Virðingarfyllt,
f.h. knattspyrnudeildar Fram,
Gústaf Adolf Björnsson
stjórnarmaður knattspyrnudeildar

Greinargerð knattspyrnudeildar Vals

Knattspyrnudeild Vals harmar mjög þau leiðinlegu mistök sem urðu þegar leikmaður félagsins, Jóhannes Sigurðsson sem úrskurðaður var í leikbann á fundi aganefndar KSÍ 27. júlí 1999, tók þátt í leik gegn Fram í Íslandsmótinu í 2. flokki karla þann 5. ágúst 1999, en átti þá að taka út leikbann skv. úrskurði aganefndar KSÍ.

Forsvarsmönnum 2.flokks karla hjá Val var ekki ljóst þegar leikurinn fór fram að ofangreindur leikmaður hefði verið í leikbanni og létu því leikmanninn taka þátt í ofangreindum leik í góðri trú. Vegna mistaka var boðum um leikbannið ekki komið til forsvarsmanna 2. flokks karla. Knattspyrnudeild Vals fellst því á kæru knattspyrnudeildar Fram.

Virðingarfyllt,
Eggert Þór Kristófersson,
formaður knattspyrnudeildar Vals

Úrskurður héraðsdómstóls KRR

Ár 1999, mánudaginn 23. ágúst kom héraðsdómstóll KRR saman og kvað upp svohljóðandi dóm í málinu nr. 3/1999.

Málsatvik og málsástæður

Á fundi aganefndar þann 3. ágúst 27. júlí 1999 var leikmaður í 2.fl. karla í Knattspyrnufélaginu Val, Jóhannes Sigurðsson úrskurðaður í eins leiks leikbann vegna fjögurra áminninga. Tók úrskurðurinn gildi á hádegi næsta föstudag þann 30. júlí 1999. Næsti leikur Vals eftir þann tíma var 5. ágúst 1999 gegn Knattspyrnufélaginu Fram. Framangreindur leikmaður lék hins vegar þann leik og kærði Knattspyrnufélagið Fram því leikinn með kæru dagsettri þann 6. ágúst og krafðist þess að áðurnefndur leikur yrði dæmdur tapaður Val með markatölunni 0-3.

Hinu kærða félagi var gefinn kostur á að skila greinagerð vegna málsins, en þar kemur fram að um mistök af hálfu forráðamanna félagsins hafi verið að ræða varðandi tilkynningu um leikbannið innan félagsins.

Niðurstaða

Með vísan til framangreindra málsatvika og greinar 4.4.1. í reglugerð KSÍ um knattspyrnumót telst Knattspyrnufélagið Valur hafa tapað ofangreindum leik gegn Knattspyrnufélaginu Fram með markatölunni 0-3.

Samkvæmt grein 4.5.3. í reglugerð KSÍ um knattspyrnumót ber knattspyrnudeild Knattspyrnufélagsins Vals að greiða sekt til KSÍ að fjárhæð kr. 5.000,-

Dómsorð

Leikur sá sem fram fór í 2. fl. karla þann 5. ágúst milli Knattspyrnufélagsins Fram og Knattspyrnufélagsins Vals dæmist tapaður Knattspyrnufélaginu Val með markatölunni 0-3.

Knattspyrnufélagið Valur greiði kr. 5.000,- í sekt til KSÍ.

Helgi Þorvaldsson
Gunnar Guðmundsson
Lúðvík Andreasson